

VIJESTI



Japanka izolovana na Infektivnoj klinici

Iz Hitne pomoći u Sarajevu jučer su na Infektivnu kliniku KCUS-a dovezli japansku studentkinju sa simptomima gripe (povraćanje, hunjavica, proljev). Kako nam je izjavila portparolka KCUS-a Biljana Jandrić, šefica Infektivne klinike dr. Sajma Krkić - Dautović za svaki slučaj je izolovala djevojku u zasebnu sobu.

- Docentica Dautović smatra da se najvjerovatnije ne radi o pacijentici oboljeloj od nove gripe tipa H1N1. Djevojka je izjavila da nije bila u dodiru s oboljelim, ali je dr. Dautović poduzela neophodne mjere predostrožnosti do sutra, kada će se znati konačan nalaz. O ovom slučaju smo obavijestili i Epidemiološku službu, izjavila nam je Biljana Jandrić.

D. S.



Čelić: Eutanazirano 66 bruceloznih grla

Pripadnici Kantonalne uprave za inspeksijske poslove Tuzla jučer su u općini Čelić izvršili eutanaziju i ukop 57 ovaca oboljelih od bruceloze. Oboljela grla pripadala su stada u vlasništvu Ešefa Beganovića iz Čelića. Prema planu rada Kantonalne uprave, ova stoka je već u petak trebala biti eutanazirana i zakopana na općinskom smetlištu, ali to su spriječili mještani Čelića, koji su se protivili da zaražena stoka bude ukopana na toj lokaciji, pa je ukop izvršen tek nakon što je pronađena nova lokacija. Pored 57 grla iz ovog stada, inspektori su u petak eutanazirali devet ovaca u vlasništvu Ibrahima Š., također iz Čelića. On je dozvolio da se na njegovom posjedu ukopaju oboljele životinje.

A. Še.

Komšić na Svjetskom ekonomskom forumu u Amanu BiH je značajan faktor

Jordanski kralj Abdulah II potvrdio svoj i dolazak kraljice Ranije u uzvratnu posjetu Bosni i Hercegovini u augustu • Podrška Arapske lige

Član Predsjedništva BiH Željko Komšić učestvovao je u četvrtak i petak u radu dvodnevog samita Svjetskog ekonomskog foruma u Amanu, Jordan. Pored većeg broja ekonomskih tema, na sesijama Forumu na kojima je učestvovala bh. delegacija, Komšić je učestvovao i na sesiji "Unija za Mediteran", na kojoj je raspravljano o novim mogućnostima i modalitetima saradnje mediteranskih zemalja, među kojima je BiH jedan od potencijalno značajnih faktora.

Na sastanku s jordanskim kraljem Abdulahom II je zaključeno da je pored, odlične



Komšić i Mesić na Forumu u Amanu

saradnje na političkom planu i izuzetno prijateljskih odnosa dviju zemalja, potrebno intenzivirati ekonomsku saradnju, za koju postoje velike mogućnosti u svim ekonomskim oblastima. Kralj Abdulah II je potvrdio svoj i dolazak kraljice Ranije u uzvratnu posjetu BiH u augustu.

Tokom sastanka s Komšićem, generalni sekretar Arapske lige Amr Musa je obećao punu i bezrezervnu podršku ove organizacije, koja broji 22 članice, kandidaturi BiH za nestalnog člana Vijeća sigurnosti UN-a na jesenjem zasjedanju, saopćeno je iz Komšićevog ureda.

Romkinje su naše sestre



Sa jučerašnje X-Press sesije

Foto: S. GUBELIĆ

Svi smo ponekad marginalizirani

Projekt X-Press, koji je zamišljen kao podrška marginaliziranim i osjetljivim kategorijama bh. društva te načinima suprotstavljanja diskriminaciji kroz zajedničku akciju nevladinih organizacija i medija, ostvaruje se i u praksi. U subotu je održana već četvrta sesija, ovaj put pod nazivom "Romkinje su naše sestre", u Kući ljudskih prava u Sarajevu.

- Svi se mi ponekad nađemo u situaciji da smo marginalizirani - i kao žene, i kao djeca. Do sada smo posvetili pažnju ženama i pravosuđu te društvenim grupama za koje smatramo da su

ugrožene po nekim segmentima. Na neki način, svi mi, kao građani, ponekad spadamo u tu kategoriju, kazala je Elvira Jahić iz Fondacije Cure te naglasila da se paralelno sa sarajevskim odvijaju i banjalučke sesije.

Indira Bajramović, članica Udruženja Bolja budućnost i Vijeće Roma BiH, bila je gošća i uvodničarka sesije. Govorila je o tome kakva je slika romske zajednice u bh. medijima, zatim koliko se "odnjegovalo" predrasuda u većini medija te o načinima kako da se prevaziđu stereotipi koji su građeni dugi niz godina.

Mr. SEKULIĆ

Izabrani novi predsjednici KO SDP-a Musić u Sarajevu, Žuljević u Mostaru, Lipovača u Bihaću

Kantonalni odbori SDP-a Sarajevo, HNK-a i USK-a jučer su održali svoje izborne skupštine na kojima je izabrano novo partijsko rukovodstvo. Tako je za novog predsjednika KO SDP-a BiH Sarajevo izabran Fikret Musić. Novoizabrani predsjednik KO SDP-a je do sada obavljao dužnost sekretara KO, a šef je poslaničkog kluba ove stranke u Skupštini KS-a. Dosadašnji predsjednik KO SDP-a Damir Hadžić je na nedavnom kongresu ove stranke izabran za njenog potpredsjednika.

Za predsjednika KO SDP-a HNK-a jučer je ponovo izabran Aner Žuljević. On je kazao kako mu čini izuzetnu čast to što je ponovno izabran za predsjednika te da će u idućih deset dana održati konstituirajuću sjednicu, na kojoj će biti izabrani njegovi potpredsjednici.

- Na sjednici ćemo pripremiti stranku kako bi se obavili izbori u OO SDP-a u HNK-u, s ciljem provedbe naše vizije koju smo iznijeli na konferenciji, a to je da prvi put SDP u HNK-u postane vlast, istakao je Žuljević.

Načelnik Općine Bihać Hamdija Lipovača izabran je za novog predsjednika KO u USK-a. On je na izbornoj sjednici SDP-a USK-a zahvalio na povjerenju i najavio promjene unutar partije, javila je naša dopisnica Dilajla Obajdin.

- SDP se mora oslanjati na ljude koji su najveći potencijal u svakoj općini. To ne znači da će se SDP nekog rješavati. Naprotiv, SDP će raditi i na uvođenju novih, ali i na vraćanju ljudi koji su u prethodnom periodu zbog nekih razloga otišli, a dobro su predstavljali partiju u svojim sredinama, kazao je Lipovača.

Wolfsburg korak do ostvarenja sna u Njemačkoj

Edin Džeko je igrač za koga će se otimati veliki

Šahovski turnir "Bosna 2009" prvi put bez velikana šaha

Ne blijedi sjećanje na Milorada Gaćinu

